

JOESEEGI

Joeseegi

2¹⁰Impogini ikamaigake maganiro tentagaigakaririra Josoe impo pashinikya kimoiganaatsi terira irogoigeri Tasorintsi tyara ikanta, aikiro tera ineaigero magatiro yovetsikagetake-rira Tasorintsi ikavintsaavageigakerira iseraereegi. ¹¹Impogini yovetsikaigake ikantavitantirira Tasorintsi, aikiro ishineventaiganakari ipegagetaganirira tasorintsi kogapage. ¹²⁻¹⁴Tenige inkematsaigari Tasorintsi ikematsaigirira yashikiiganakeririra gaigaatiririra Ejipitoku. Irirokya yogagashiiganaka itasorintsiegite kananeoegi yaventaiganakarira, ovashi ikisaviigakeri Tasorintsi tenige impugamentaigari nerotyo yoverajaiganakerira kisaigakeririra ikoshinanaiganakerira tyampa inkantai-gaempa ishintsitashiigaerira. Ario ikañoigakeri Tasorintsi maika ineaigakeritari inti yaventaiganaka tasorintsi paitacharira Vaare ontiri pashini tasorintsi tsinane paitacharira Asetarote. ¹⁵Nerotyo omirinka iaigavetaka iromanataigakempara onti yagaveaigunkani, irirotari kisaigakeri Tasorintsi, ovashi ikenkisureavageiganaka yatsipe-reavageigakera, ariotari ikantakeri Tasorintsi pairani.

¹⁶Kantankicha irirori itsarogakagaigaari-tyo ikantake intimakera ijoeseegite pugamentaigakerineririra. ¹⁷Kantankicha ariotyo ikañoigakeri iriroegi teratyo

inkematsaigari ariompatyo yaventaiganakariri ipegagetaganirira tasorintsi kogapage. Tera inkañoigaempari tomtaiganakaririra ikematsaigirira Tasorintsi itsatagaigirora ikantagetirira. ¹⁸Antari aiñora inake joese yogari Tasorintsi itentakari nerotyo ishintsitashiigairira kisaigakeririra, itsarogakagaigakaritari ineaigakerira yoveraavageigakerira yatsipereakagavageigakerira. ¹⁹Kantankicha antari ikamanaira joese ogatyo ikenagake ikañoiganaa okyara yovetsikaiganaira terira onkametite pairotyo yogagavageigaka yavisaigakerityo yashikiigakeririra. Ipegageigakerira pashini itasorintsiegite ipomirintsiventai-ganakarira irogishineaigakerira, aikiro ikanagaventaigakarira. Tyampatyo inkantaigakenkani irapakuakagaigakenkaira yovetsikaigakerira. ²⁰Impo ikisutaiganaarityo aikiro Tasorintsi ikanti: “Maikari maika teranika inkematsaigena intsatagaigakerora nokantaigakeririra yashikiiganakeririra ariotyo nonkañotake naro garatyo notsatagiro nokantakerira. ²¹Garatyo noneagaigari yogaegi aiñokyarira inagai tekyarira impogereaigeri Josoe. ²²Kantakani intimaigakera kara iriroegiku iroveraanaigakerira kameti noneaigakerira ariorika inkematsaiganakena inkañoigaemparira yashikiiganakeririra ontirika gara.”

Impogini avisanaira 200 shiriagarini imechotake kamantantatsirira Samoiri.